


PL
2771
.A6
v.1




八指頭陀詩集

楊度題

YORK UNIVERSITY

MAY 15 2001



2771
A6
v.1

八
指
頭
陀
詩
集

楊
度
題

YORK UNIVERSITY

MAY 15 2001

ASIAN STUDIES

己未仲冬月刊
於北京法源寺

板存北京

法源寺
文楷齋

舊亭

詩歌僧律所戒而寒山以之度世唐時俗尙吟咏亦猶
鷲音獸言入其羣以接引之也寄禪師兄幼誓出家然
指求法精進甚苦初不識文字忽有慧悟通曉經論有
踰宿臘然頗癖於詩自然高澹五律絕似賈島姚合比
之寒山爲工湖外樸儉士大夫雖異之莫能崇奉檀施
也故得全其孤潔自吟自賞而已使有刺史求見之幾
何而能留國清乎夫法尙應舍何況言語然世尊相好
妙音皆嘗示見供人贊仰生人信向闔運平生求工文
詞信爲逐末矣旣見所錄輒題以告學者丁亥閏月戊

申湘潭王闔運序

舊序

自晉以來文勝至唐詩勝趙宋理勝而釋家均隨世有拔萃之秀就詩論之唐僧詩不能頡頏王李六朝僧詩無愧陸謝唐後益靡矣蓋法顯支公兼文理以爲詩齊已諸人徒事吟咏故也謝靈運譏孟顗無慧業慧者圓頓之所尙業者退墮之所由然謝雙舉爲言豈不以一切法爲慧爲業乎知業之善猶不善益知業有善有不善也其理非趙宋後之理其詩卽非趙宋後之詩也吾鄉多詩僧詩不勝余僧定不勝余而寄禪和尙以慧業故不由識字自然能文衆聳異之爭相傳鈔欲其省便

因爲刊布余初序之引賈島以比意以爲不過唐詩僧之詩耳旣隔一年復有續作乃駸駸欲過惠休余序未爲知言亟刊前序更爲論定亦見進步之速也寄禪得慧而能兼文理以爲詩可謂希有雖然慧亦業也法亦業也散花所以供養何故反以著衣爲結習衆無花業故故亦無花慧知此而寄禪可爲詩亦可以不爲詩矣
戊子十一月旣望王闔運改定重題

舊序

余識寄師十餘年矣見則口吃吃吟其詩一字未安推敲竟日故其詩日益進而集且日益富矣寄師盛年從武岡鄧白香吾邑王湘綺兩先生遊其詩宗法六朝卑者亦似中晚唐人之作中年以後所交多海內聞人詩格駘宕不主故常駿駿乎有與鄧王犄角之意湘中固多詩僧以余所知未有勝于寄師者也自癸酉年始至戊戌年止共得詩十卷其前五卷義甯陳伯嚴考功校刻行世卷六至卷十爲之續刻有爲前本未錄者余仍選得數首附後補遺凡半年而功畢寄師往來梓人

處猶復改刻不休其溺志苦吟信有不可及者釋氏喜
言因緣如寄師者殆所謂有文字緣者耶戊戌臘八日
湘潭葉德輝識

敘

予世居湘潭之薑畬寄禪師爲薑畬黃姓農家子幼孤
貧爲人牧牛十餘歲時投山寺出家爲僧然兩指供佛
故名八指頭陀師長予將二十歲予幼時卽聞鄉有奇
僧具夙慧能爲詩初不識字以畫代書不知壺字輒畫
壺形其時薑畬鐵匠張正暘及予妹叔姬皆不學詩而
自能詩鄰居三里以內有此三異鄉人傳以爲奇而王
湘綺先生隱居雲湖相距才十餘里予輩咸師事之其
地又有老農沈氏能學陶詩羣呼爲沈山人又有陳梅
羹處士亦居薑畬博學能詩不事科舉刻有陳薑畬集

一鄉之中詩學大盛高談格調卑視宋明漢魏三唐自成風氣惟師自出家後遠遊於外其先塋在薑畬偶歸拜墓因來相訪予始識之聞其自言初學爲詩甚苦其後登岳陽樓忽若有悟遂得句云洞庭波送一僧來後遊天童山作白梅詩亦云靈機偶動率爾而成然師詩格律謹嚴乃由苦吟所得雖云慧業亦以工力勝者也師曾宿予山齋予出屏紙強其錄詩十字九誤點畫不備窘極大汗書未及半言願作詩以求赦免予因大笑許之自後師不再歸予亦出遊湖海流離十有餘載中間未曾一見惟予居日本時師自浙江天童山寄詩一

首而已民國元年忽遇之於京師遊談半日夜歸宿於
法源寺次晨寺中方丈道階法師奔告予曰師於昨夕
涅槃矣予詢病狀乃云無病道階者亦湖南人妙解經
論善修佛事師之弟子也予偕詣寺視之遣歸葬於天
童並收其平生詩文遺稿以歸待乞湘綺先生爲刪蕪
雜以之付刊先生暮年耽逸久未得請予亦因政變身
爲逋客未暇及此湘綺先生旋復辭世更越二載予得
免名捕復還京邑始出斯稿以付手民然未敢爲刪定
僅整齊次第之而已師詩曾由義寧陳伯嚴湘鄉王佩
初同縣葉煥彬先後爲刊十卷其未刊者八卷師自定

爲續集今爲輯合而全刻之附以雜文都爲十九卷道
階及予妹壻王君文育同學喻君味皆友人方君叔章
爲之校字文育湘綺先生第四子也凡校刻經八閱月
而始成距師逝世逾七年矣世變孔多劫灰遍地而此
稿猶存端忠愍辛亥南行從予借取叔姬詩稿以去云
將鈔稿見還後乃攜以入蜀革命事起端旣被害稿亦
遺亡副本雖存然不備矣予丙辰歲逋亡出京之日隨
身手篋所儲只此故人遺稿故未散滅以至於今執彼
例茲寧非獨幸世間生滅無常一切等於此物師何必
有此作予何必無此刊事與教法無關而於因緣足述


故詳敘之於此民國八年十二月湘潭楊度序

八指頭陀詩集卷一

釋敬安寄禪

祝髮示弟

癸酉補作



人間火宅不可住我生不辰淚如雨母死我年方七歲
我弟當時猶哺乳撫棺尋母哭失聲我父以言相慰撫
道母已逝猶有父有父自能爲汝怙那堪一旦父亦逝
惟弟與我共荒宇悠悠悲恨久難伸搔首問天天不語
竊思有弟繼宗支我學浮屠弟其許豈爲無家乃出家
歎息人生如寄旅此情告弟弟勿悲我行我法弟繩武
泊空舫巖上杜公亭

杜老留題處征帆又此停水痕侵岸白嶽色向人青
檣燕飛何處江猿不可聽
竭來一憑眺落葉滿空亭

題陳伯麀鎮軍隱居

將軍奏凱還高臥此中間
綠樹覆幽谷白雲生遠山
雄心銷劍氣勲業驗刀瘢
萬里沙場月依然照草關

送春

一枕煙霞睡味賒不知春去野
人家數聲嘯鳥幽窗外
驚起山僧掃落花

莫秋偕諸子登衡陽紫雲峯

紫雲最高處飛錫共登臨
秋老山容瘦天寒木葉深
西

風孤鶴唳流水道人心坐久林塘晚寥寥鐘梵音

宿嶽麓寺待笠雲長老不歸

得得扶筇上翠微寒林空見白雲飛鐘鳴古寺人初靜
月滿蒼松鶴未歸

題玉池別墅

溪山深處主人閒山外桃花漲一灣一入仙源塵世隔
莫隨流水到人間

長沙龍潭山有寄禪與余同字喜賦

楚水吳山各一天論交印合有前緣西方自古三迦葉

東土何妨兩寄禪

君江南宜興人工草書能詩貌癯
余體豐甚時人有大小寄禪之稱

富尹和白

鎮日焚香禮翠微
松花落滿水田衣
柴門寂歷生幽草
除卻孤雲客到稀

君山返棹

寒鴉旅雁莫天飛
半落平沙半翠微
最好湖山看不盡
洞庭船載夕陽歸

懷精一上人

思君不可見
朝朝悵煙霧
衡陽雁已遙
遠書寄誰去
忽見黃鳥飛
出谷鳴高樹
躊躇東復西
幽情共誰語

喜劉甫臣過訪

雲廚苦淡薄留君何所待山上拾枯松歸來煮野菜無
酒亦成歡佳會言難再

偶作

長嘯返林壑息心了無求盈虛有真宰得失忘喜憂懷
此得真趣因之絕世遊煙霞最深處麋鹿皆吾儔

送海峯上人行腳

甲戌

南詢從此始煙水浩漫漫一鉢飄然去千山次第看江
雲春樹碧海月夜鐘寒處處隨緣住無求夢亦安

薄莫偕瘦松龍山散步

興來驅我去薄莫入雲深流水半江月松風萬壑琴歸

漁喧渡口晚磬出疏林與子一爲樂彌生清淨心

春日漫興與師老人作

獨處罕儔侶草堂冬復春澗花飛獻佛林鳥語親人白
髮吟情淡青山道味真寥寥塵境外木石自爲鄰

將之南海賦別

乙亥

舊院安禪處經年錫一臨欲辭溪澗水去聽海潮音白
髮憐師老青山悵別深空門本無我那有去來心

楓橋夜泊和唐人韻

白露橫江水接天秋懷黯黯不成眠一身漂泊三千里
獨宿蘆花月滿船

杭州 丙子

欲把杭州當橘洲
閒身到處便勾留
此生不作還鄉計
飽看湖山到白頭

春日靈峯途中

春來多逸興
獨去款巖扉
澗草青承屐
溪雲白上衣
落花隨水至
野鳥伴人飛
樵路行將盡
鐘聲出翠微

莫遊玉泉寺

夕陽林谷暝
衆鳥亦知還
涼月一渠水
殘雲數點山
偶隨寒磬入
欲共老僧閒
夜久羣動息
輕煙澹碧鬟

西湖行宮二首

孤山猶見五雲遮
父老年年望翠華
水殿無人秋寂寞
清溪開遍白蓮花

夾岸青青御柳垂
朱甍碧瓦壓湖湄
斜陽輦路多秋草
卻憶三朝全盛時

瑪瑙寺懷古

生公講
經處

地僻雲深少客來
梵王宮殿盡塵埃
淒涼一片西湖月
猶照生公舊講臺

遊三茅山普安寺

丁丑

直上南來第一山
薜蘿深處款禪關
聽松一拂依然在
化鶴三茅去不還
古洞煙消丹竈冷
叢巖雨過白雲閒

請看原上壘壘冢誰乞金丹駐玉顏

莫秋書懷

身似孤雲無定蹤南來三度聽霜鐘人方見雁思鄉信
山亦悲秋帶病容佳句每從愁裏得故人多在客中逢
自嗟未了頭陀願辜負青山幾萬重

將之天童結茅

山僧性愛山不樂人間住欲持瓢笠行更入山深處

歸茅山

禪心不及白雲閒荏苒風塵老客顏一別林間驚歲晚
歸來紅葉滿秋山

秋日有感

島樹落黃葉故鄉仍未還客情倦飛鳥病骨瘦秋山試
照恒河水已非疇昔顏何時衡嶽下歸掩白雲關

宿阿育王寺

秋林日色微樵徑語人稀一雁隨雲度孤僧帶月歸霜
清聞木落夜靜見螢飛獨宿空山裏超然與世違

重陽後一日偕水月上人登慈谿驃騎山

重陽後一日結伴此登臨萬壑白雲滿千山紅葉深寒
潮明遠浦疏磬散空林憑眺斜陽裏茫茫愁古今

莫秋茹峯山閣晚眺

高閣凌霄漢登臨見大荒輕煙凝遠樹疏雨澹斜陽江
淨寒潮白秋高木葉黃憑欄不欲去明月照衣裳

住山吟爲與了上人作

結廬人境外終日掩柴關法侶檐前樹禪心雨後山種
松期鶴宿掃石待雲還寂寞幽棲子忘機與物閒

閉關

天涯倦遊客築屋掩禪關世界微塵大身心一味閒種
蓮聊結社悟理當看山寄語宗雷輩相期共往還

人日重過茅山寺疊前韻

戊寅

心似飛雲思故山又攜竹杖叩柴關澗流碧水仍如舊

人逐青春去復還看石忽驚禪影瘦聽松殊覺野情閒
白頭老宿歸何處惟有孤鐙照病顏

秋夜偶成

八月秋風夜氣清蒲團枯坐萬緣輕巖前月墮定初起
錯聽溪聲是雨聲

曉過聚德禪院訪屠子中

言訪幽人宅芒屨踏曉霜遙山開曙色落月澹秋光清
磬出花早寒鴉覓食忙閒雲眠未起初日滿扶桑

秋日登伏龍山

鷲嶺鬱崔嵬登臨亦壯哉秋聲生遠樹落葉掩荒苔海

闊孤帆度天空一雁來故山不可見愁絕莫猿哀

送阮鏡容出山

煙霞不肯住煙水蕩歸舟落日送行色秋風生旅愁帆
隨片雲遠江挾衆星流他日重來此溪山記得否

過棲隱禪院訪懶愚上人

乘興問誰適翛然獨訪君爲求一字友踏破萬山雲古
木當檐出孤鐘隔水聞遠來相問訊無語立斜曛

懷靈芝山人

萬壑千巖下幽懷誰復知梅花寒不放明月冷相窺窮
病爲詩料閒愁當酒資神仙隨物化何用采靈芝

重宿天童山寺

山有鎖翠亭堆雲塔

踏遍千山復萬山夕陽影裏叩禪關爲尋鎖翠堆雲地
重到幽花瘦石間茅榻鐙昏僧入定松枝月冷鶴初還
自憐碧海浮杯客三宿雲房鬢欲斑

重宿茅山寺

十年蹤迹類飄蓬又宿南來第一峯清夢正貪歸路近
月明何處一聲鐘

訪育王心長老作

行行不覺遠入谷已殘曛松翠近可掬泉聲咽更聞水
清魚嚼月山靜鳥眠雲寂寞雙林下煙霞長屬君

雪中題呂文舟居

扶病策疲蹇言尋靜者居
天寒過客少梅老著花疏
鳥啄檐前雪風翻案上書
不知灞橋上詩思近何如

贈屠寄梅

庚辰

白髮蒼顏與世違閒居野外獨忘機
一泓流水觀魚樂半樹斜陽看鳥歸
垂釣月明蘆荻岸采芝雲溼薜蘿衣
知君志在溪山裏祇恐丹書下翠微

懷湘陰郭增頤

日落寒林萬樹煙懷君此際倍淒然
秋風雁斷書千里涼月光浮水一天
結社青山還憶昨渡杯滄海已忘年

若耶溪畔雲門寺何日孤鐙對榻眠

贈黃子賁

細雨微風裏淒然一送君他鄉貧作客相贈祇孤雲

逢祖印上人

辛巳

百花深處一逢君杖履飄然迴出羣不改山中真面目
衲衣猶補嶺頭雲

與與了上人話舊

當時楚水嶽雲間持鉢從遊鬢未斑一十二年如電拂
白頭相對話岐山

與長沙袁俊良總戎過育王嶺

日暮煙鐘鳴歸路西風緊夕陽在寒山馬蹏踏人影

別楊靈荃社友

唱罷驪歌思悄然山含落日水含煙卻愁今夜江頭月
獨照離人上客船

畚吳燮堂

我與青山有宿緣住山不要買山錢山中歲月如流水
纔看梅花又一年

雪竹

風雪漫相欺青青不改移無人見高節祇有白雲知

還山作 壬午

長揖謝人羣養痾依林泉繩牀不盈尺茅屋纔數椽乞
食縱不飽喜無塵事牽游興忽以至拄杖追飛鳶所歷
旣已疲還就樹下眠逍遙隨所適孤雲與之然

訪宗明州湘文

寂寂深山晝掩門芒屨未忍破苔痕今朝欲訪故人去
黃葉蕭蕭下遠村

題畫

一株兩株松三箇五箇竹巖扉長寂寥祇有雲來宿

題竹

一片清陰覆綠苔心虛原不著些埃臨風忽忽秋聲起

疑是瀟湘夜雨來

懷湘曲

八月九月天氣涼霜催萬木皆凋黃久客他鄉思故鄉
故鄉遠在洞庭傍洞庭連天水茫茫波中突出君山蒼
昔年一舸浮滄浪鶴汀鳧渚相徜徉泠泠晚鐘鳴夕陽
蕩漾明湖青黛光天風飄飄吹我裳

懷心泉長老禪房

萬山合沓路橫斜老樹斜陽集暮鴉猶記支公留宿處
一窗霜月凍梅花

正月二十五日過白雲竹院

癸未

暮逐閒雲入竹房
梅花夾道澹生香
笑看孤墻離奇甚
瓦上松枝挂夕陽

訪陳啟南

微雨睡初醒
扁舟入渺冥
潮連蟹浦白
山接馬鞍青
細草迷幽徑
閒花落廣庭
主人能好道
薄醉聽談經

題悟真上人山房

浮世渾如夢
深山獨息機
雲從冷處臥
鳥向靜中飛
永夜歌明月
終朝坐翠微
雨餘茅屋冷
苔色上人衣

夏日偕錢子和蒲仙昆仲遊玲瓏巖

偶著謝公屐
相隨此地遊
嶺雲多在樹
溪雨欲沈樓
地

僻人稀到巖深夏亦秋夕陽歸路好谷口起樵謳

題來誰園

洞門寂寂鎖蒼苔舞榭歌樓賸劫灰惟有多情數竿竹
依然青過矮牆來

自遣

鐘梵晚蕭蕭山廚歎寂寥夜泉和月煮野菜帶雲挑
雪竇千丈巖觀瀑布

瀑布長千丈迢迢挂碧天何當翦一片縫作衲衣穿

懷郭菊蓀司馬

長安不見悵何如雲白山青萬里餘不識故人身健否

十年未報一封書

舟中秋莫

西風亂颭荻颼颼欲繫孤篷不自由落葉有情飛送客
秋山無語暗生愁雲煙到處隨行腳霜雪欺人欲上頭
我本無家任漂泊又隨明月過滄洲

題天台十甲子老僧坐禪處

萬木森寒入翠微飄然鶴髮久忘機溪聲畢竟無今古
山色何曾有是非澗草自迷遊客屐巖花時落坐禪衣
問師何代天台住手種青松已十圍

登天姥峯

久羨茲峯勝登臨日欲西鳥隨紅葉下人與白雲齊怪
石立如鬼巉巖斗若梯不從高處望誰信萬山低

登華頂峯

腳底聽流泉人來飛鳥邊羣峯盡如蟻片石欲撐天吳
越雲中盡星河樹杪懸登臨愜懷抱飽看萬山川

國清寺

樵路行忽盡青蓮擁化城水迴雙澗曲雲截五峯平不
見寒山子空聞智者名余生獨何晚懷古一傷情

奉化雪竇山居用王右丞香積寺韻二首

欲覓幽棲處千峯復萬峯偶來黃葉寺聽打夕陽鐘枕

借雲邊石詩題洞口松登高一長嘯驚起隱潭龍

隱潭爲神

龍所宅旱時有禱輒應

苔磴懸青嶂茅簷俯碧峯煙中不見寺花外祇聞鐘瀑布千巖雪珠林一樹松雲陰天欲雨疑有聽經龍

太白山居疊前韻二首

結茅淩絕頂終日對前峯目斷三秋雁心清五夜鐘欲招池上月疏種澗邊松氣變知時易春雷起蟄龍偶隨樵子入得住最高峯自汲寒潭水時聞遠寺鐘雨餘方看竹雪盡始憐松宴坐本無事何心制毒龍

題雪竇中峯寺再疊前韻

心目忽昭曠晴空插一峯斷橋填積雪絕壑墮疏鐘掃
石苔侵席翻經月挂松遊蹤罕到處老樹半成龍

贈中峯菴主三疊前韻

何年來雪竇卓錫住中峯獨坐清溪石誰敲靜夜鐘猿
嘯千嶂月人老一庭松咒水趺趺坐時看鉢入龍

重九病中寄勵季龍

尋山復問水不記幾由旬孤館逢佳節寒鐙憶故人秋
風欺病骨明月冷吟身消瘦誰相似黃花爲寫真

送秦舍人子質入都

歲晏欲何適天涯行路難猿聲楚山莫潮落廣陵寒遠

八掛山詩集卷一
別從茲始離尊語夜闌故園花發後應已到長安

歲莫奉懷舅氏

歲莫鄉心切雲山道路賒別來惟有淚歸去已無家親
舊漸寥落流年換鬢華艱難憶吾舅隕涕望長沙

癸未冬半谷禪友招余度歲陽堂甫半月子卿弟
從楚來越促余下山賦此留別

巖谷思深遁天心未許閒行吟辭白髮灑淚下青山兄
弟情何重煙霞債未還無窮離別意都付夕陽間

甬江送子卿歸里

欲語淚沾襟天涯遠客情君行休作別不忍見君行

重遊雪竇懷秦鹿笙先生

甲申

故人來此地曾問上乘禪
同坐澗邊石遙聽樹杪泉
山猶青似昔髮已白於前
再見知何日相思倍悄然

過徐酤仙故宅

酤仙鄞人善飲工書自號四明醉客

門巷蕭條長綠蕪
流鶯猶似勸提壺
野棠含雨梨花白
不見高陽舊酒徒

送立松上人還日本

滄海渺無極鄉關何處邊
歸帆遙向日島樹遠含煙
洗鉢鯨吞水窺齋鳥入船
此行應不負了悟大乘禪

三遊雪竇

扶筇三上妙高臺又欲題詩掃石苔野鶴閒雲應識我
一年一度入山來

辭明州太守宗公湘文請住仗錫山寺

癸未

萬壑千巖深復深此山真是四明心

仗錫有漢人摩巖隸書四明山心四

大字每字長丈餘筆力古樸非晉人可及誅茅欲就雲間住恐有樵人遠見

尋

太守得偈堅請不已復此示意

癸未

多年枯木

余昔名枯木頭陀

已無枝那得猶蒙大匠知祇合寒

巖煨芋用法門梁棟總非宜

附錄馬文齋詩

仗錫

仗錫四名
山峰名

嵯峨冠海濱
石窗開處隔紅塵

四明山有

石巖如窗四面明豁故號四明甯波
古稱四明又稱明州均以是山得名

如何太守叮囑

語不與青山作主人

八指頭陀詩集卷之一終

八指頭陀詩集卷一

却

八指頭陀詩集卷二

釋敬安寄禪

白下懷隨園

乾嘉風雅共推袁回首倉山欲斷魂
十載干戈寥落後荒煙無處認隨園

山中漫興寄王子獻

紫芋黃精飽我饑律身常奉懶殘師
喜無白髮悲秋想祇有青山結夏思
花雨一簾僧對弈茶煙半榻鳥談詩
林間風景長如此君但能來莫限期

題寒江釣雪圖

垂釣板橋東雪壓蓑衣冷江寒水不流魚嚼梅花影

訪朱泚瀾

雨後秋花落更開萬山紅葉忽成堆無端又訪龐居士
戴得斜陽一笠來

登太白山

白雲扶我下蓬萊爲訪長庚得得來幽谷虎過苔有迹
澄潭月印鏡無埃山從拄杖頭邊出花在遊人腳底開
海闊天空豁懷抱此身疑向九霄回

秋江

兩岸蘆花似雪飛天涯回首倍依依秋風有意留人住

細雨無聲送客歸，千里關山行腳倦。
百重雲水與心違，旅懷此際憑誰說。
黃葉蕭蕭落滿衣。

甲申八月自四明歸長沙

誰憐孤雁向南翔，楚水吳山道路長。
趁得一帆風色便，到家恰好是重陽。

一鉢飄然已十年，每逢佳處便留連。
鐵鞵踏破徒辛苦，依舊青山滿目前。

題煙江疊岫圖

江煙漠漠水潺潺，樹杪人家樹底山。
我欲誅茅就煙水，往來時共白鷗閒。

白海上歸與本師雲和尚夜話

不侍巾瓶側，惛惛已十年。早知布毛意，何用草鞵錢。夜雨談詩坐，孤鐙對榻眠。別來多少事，語罷欲潸然。

過杲山寺呈一心老人

痛心吾道切，垂老不容閒。昔住白霞寺，今開紫鶴山。雲煙生講席，花雨落禪關。悵別慈顏久，蒼蒼鬢髮斑。

杲山題壁

林泉無俗韻，遊賞及辰良。倦鳥自知返，閒雲不解忙。鐘鳴千嶂夕，花落一庭香。老宿得真寂，身心俱坐忘。

卜築衡嶽煙霞峯，水石清幽竹樹蒼。蔚然成詩

身閒罕人事
瓶鉢足生涯
晴曦春前藥
香聞雨後花
溪聲清枕席
雲氣濕袈裟
箕踞長松下
朝朝餐碧霞

重過江舍

乙酉

鶯啼花落故園春
一樣風光獨愴神
多少故交零落盡
歸來翻似異鄉人

重晤陳梅根

故人二十七年別
今日相逢似隔生
多少離情不能語
急風吹雨打窗聲

過故居

幼與吾廬別
今來鬢已華
園荒頻易主
樹老半無花
相

見幾人識欲言還自嗟卅年真一夢還憶聚恆沙

春懷

忽忽江湖老悠悠天地閒孤雲歸楚岫春雨夢吳山異
域同漂泊故人悲未還

謂精一光
明二師

祇應幽澗水留照鬢

毛斑

六月十三日與劉北固王君豫曾重伯陳伯嚴陳

伯濤雅集上林寺

佳辰集縑素宴坐無雜賓放曠恣言笑聊以適性真微
雨沐庭柯涼颼動葛巾山果應節早園蔬薦時新焚香
啜茗清淨土空諸塵雖無杯中物不見攢眉人希蹤遠

公社永好託芳鄰

還山懷甬上舊遊

山川倦遊覽言歸松下房
蘭桂馥前庭桃李蔭後堂
心閒息衆喧鳥雀近人翔
長夏五六月高枕傲羲皇
微雨一以過枕簟有餘涼
夜來鐘梵寂虛室聞天香
圓月揚清輝清輝鑑衣裳
忽念平生親遠隔天一方
思欲一見之關路何茫茫
安能生羽翰倏然淩君旁

碧湖消暑

畫橋西畔柳陰東
十里平湖水接空
不似人間苦炎熱
衲衣閒坐藕花風

重晤舅氏有感

十年離別苦況是渭陽親偶與骨肉會難禁涕淚頻蒼
茫雲水意衰病薜蘿身共話斜陽裏還疑夢未真

舅氏攜家歸里喜賦

高蹈謝時輩長歌歸舊廬閒尋山水趣笑課子孫書寫
葉晚霜後種花新雨餘委懷在詩酒直欲老樵漁

碧湖晚眺與寶覺居士吳雁舟同作

碧浪湖邊寺紫微山上亭湘浮一線白天壓四圍青細
草侵禪塢閒鷗浴遠汀數聲漁笛晚驚起蟄龍聽

喜會重伯陳伯濤見過用伯濤見贈原韻三首

茶話日將夕虛堂聞梵音道根俱不淺靜理亦何深
貽我郢中曲勞余塵外吟誰能一彈指了悟去來今
是法無高下誰分大小乘水雲天漠漠身世日騰騰
白髮愁難卻青山歸未曾聊將松頂月分作佛前燈
幽寂雨華寺禪宗衆所歸雲生遊客屐花落講僧衣
大覺看身妄玄談入理微上方鐘磬裏惜別語依依

書感

古道去已遠澆薄離眞醅玄紫旣異彩各自親其親
水渾魚所樂木直斧所掄幽蘭沒荆棘得以全其眞

呈鄧彌之先生用見贈原韻

八
山
詩
集
卷
二
五
達人謝物役林下散幽襟以我看雲意知公出岫心松
風蕩煩暑山月照清吟懷抱獨千古寥寥誰賞音

宿麓山寺

一雨滌煩暑翛然曠我襟涼風引秋意夕磬定禪心掃
石成孤坐倚松時一吟夜深樵唱歇巖溜續清音

麓山采藥

采藥入雲路行行日西斜涼風動修竹高樹藏昏鴉木
脫山露骨澗香藤落花留連夜深返江月鳴清笳

山行

意行隨所適佳處輒心領林深闌無人清溪鑑孤影

秋夜懷王伯諒

秋夜不能寐秋蟲鳴砌間疏鐘雲外寺落葉雨中山以
我意不適想君情倍艱何時復相見一笑破愁顏

開福寺懷古

祇今開福寺自昔會春園駐錫神僧杳流杯舊址存客
來一灑淚花落竟無言懷古情何限江寒嘯莫猿
往事已如夢宮花冷夕陽秋風吹落木衰草語寒螿五
代豪華盡千年霸業荒淒涼湖上月曾照幾興亡

碧湖亭晚眺

會春園裏亂棲鴉佳宴堂前日影斜洗盡繁華一湖水

野風吹放白蓮花

秋夜懷鹿門戒兄

去歲麓山寺相逢笑口開
驚心復黃葉行迹長青苔
鴻雁書難達別離情易哀
寄聲湘浦月好送夢魂來

麓山寺題瓊公房

一室超諸有禪扉
夜不扃山光四圍
碧松色六朝青鳥啄齋餘鉢
猿窺講罷經夜深人語寂冥翠落空亭

虎岑送慈和上人歸衡陽

西風吹落葉先向客中間
已動悲秋意那堪復送君
長辭虎岑月高卧雁峯雲
此後松根石何人話夕曛

立秋夜聞蟋蟀

如何當此夕寂寞發哀鳴
忽墮孤鐙淚還傷遠客情悲
風驚葉落餘響入秋聲
念爾愁難寐荒村欲五更

少嵐上人索題芋園印譜拈此應之

大道本無文字象雪鴻偶寄爪泥痕
我亦印空書咄咄
了無工拙與人論

歸雲

煙樹蒼茫疊翠微道人長掩竹中扉
白雲也識山居味
不待鳴鐘已早歸

與湛大笠山

一自天台采藥歸蕭然更覺世情非
慇懃特向故人道爲覓雲山挂衲衣

送吳稱三官城步教諭

石筍峯高高插天
窮坡坡上草如煙
一官底事輕拋去
寂寞春山響杜鵑

過養知書屋敬贈

高卧白雲裏
翛然獨掩扉
立言不苟合
與世自相違
豈爲一身計
甯辭衆口非
平生憂國淚
多少在朝衣

題吳稱三石筍山房圖

丙戌

活活蘭溪水
峩峩石筍峯
幽人抱奇節
結宇依青松
風

定樵聲近林昏樹影重何時筇竹杖來訪鹿門蹤

擬古二首

西嶺自逶迤東城亦崔嵬仰觀浮雲馳俯聽悲風來山
川自如昔古人安在哉青條不再榮白骨縈蒿萊本無
千歲期徒爲百世哀采藥求長生海上空徘徊達人隨
大化一任芳華摧

繁露摧蕙蘭春風馥桃李人生大塊中逐物寧有已物
遷情自移美惡無定理執情紛是非解空無彼此尙不
慕泥洹焉知佈生死

六月十五碧浪湖看月遇雨用王壬秋社長韻

長夏苦炎鬱一作郊外遊西麓縈煙青澄湘靜不流芳
藻襲行衣鐘梵聲寥幽虛亭納湖光佳客與淹留相期
趁涼夜汎月迴輕舟層雲翳太虛四座風颼颼飛雨湖
上來颯然天已秋寒暄異須臾萬事良悠悠

題按察使夏公嶽遊詩後

一解簪纓累名山恣意看望衡湘九轉入嶽路千盤絕
頂懷韓愈寒巖訪懶殘懸知望日處應可見長安
聞道方廣勝逍遙得大觀泉飛六月冷衣染萬山寒老
衲能分餉樵夫不識官朱張遺蹟在聊爲小盤桓

九月十九玉池老人招集碧浪湖展重陽因賦

老人興不淺飛蓋入煙霞展作重陽會還勞長者車清
言契尊酒高詠動鳴鴉莫悵歲華晚籬邊菊未花
偶尋蓮社約似接竹林遊細雨林塘晚微風草樹秋湖
山得佳賞車馬此淹留惆悵煙鐘動獨歸池上樓

秋夜憶弟

憶弟夜難寐挑鐙心自悲難分家室累忍讀鵲鴿詩對
月空垂淚還鄉未有期幽人正愁絕蟋蟀爾休嘯

送戴仲山歸衡山

一曲驪歌不可聞布颿湘上掛斜曛異時相訪應難遇
七十二峯多白雲

贈璧臣居士

繁華事散鬢如絲萬里青山獨往時一種風情誰得似

嶺南爭唱荔支詩

君有尊前聚散多萍梗嶺外風情祇荔支句爲人傳誦

題碧虛煉師此君軒

仙家翻厭漁人俗不種桃花祇種竹簌簌清風涼滿軒
坐久不知衣已綠

武昌城晚眺

薄暮古城頭蒼茫萬里秋大江流漢水落日滿汀洲天
地一迴首關山起夕愁南樓今夜月還憶庾公遊

登黃鶴樓

昨放洞庭舟今登黃鶴樓白雲不可問漢水自東流落
日千帆影微霜萬木秋時聞吹鐵笛一洗古今愁

焦山

焦公棲隱處落日獨經過帆影懸青嶂鐘聲出碧蘿潮
生京口闊山赴海門多昔人不可見惆悵此巖阿

登金山留玉閣

高閣一憑眺蒼茫太古情天疑入海盡潮欲挾山行芳
草金陵渡斜陽鐵甕城鄉關杳何處向晚客愁生

登潤州城閣

潤州城上閣侵曉一憑軒碧霧沈焦嶼青山斷海門春

潮欲平岸野屋漸成村
兵火餘殘壘誰招壯士魂

戲贈濬川居士

十載身如一葉輕
青山到處自題名
每來玉几雲邊宿
曾向金鰲背上行
鉢裏尙餘香積飯
詩中猶帶海潮聲
舊遊歷歷爲君數
煙水蒼茫無限情

露宿

明星爛如燭
山鬼聲相續
白雲蒼然來
伴我巖下宿
過曹居士竹蒲山房

心曠山色遠
衣寒松露滴
一徑蒼苔深
惟餘虎行迹

碧湖雅集呈王雁峯山長

不覺日云暮湖臯靄夕陰西風侵客鬢黃葉入詩心見
指休迷月賞音不在琴勝遊情未已疏磬出雲深

贈泊然菴主

海外曾隨博望遊暫因親老乞歸休秋風萼菜思吳郡
落日高樓望越州萬古興亡付杯酒五湖煙月入扁舟
與君欲結東林社未必青山許白頭

述懷

十六辭家事世尊孤懷寂寞共誰論懸巖鳥道無人迹
壞色袈裟有淚痕萬劫死生堪痛哭百年迅速等朝昏
不堪滿眼紅塵態悔逐桃花出洞門

過徵觀居士別墅

主人頗好靜塵事不能羈
掃石留僧話看雲出岫遲
弟兄俱好道婢妾亦能詩
看取禪心靜蓮花出水時

贈吳雁舟

獨有延陵子精廬每見過
禪機信敏捷綺思未銷磨
偶看楊枝舞爭傳桃葉歌
天花紛落處誰識病維摩

將還山貽寶覺居士

忻忻梅始榮冉冉歲將闌
主人敬愛客昕夕鎮盤桓
明知別有時且爲須臾歡
誰能同世情別後懷辛酸

遊仙四章與笠老人作

天上蟠桃幾度開三千年後我重來衆仙同日成高會
下界何人念劫灰蒼狗白雲時變幻清風明月幾徘徊
人間甲子須臾事且盡南山獻壽杯

高下樓臺白玉京侍兒窈窕董雙成笑看星斗樽前落
俯視河山足底生閬苑有桃臣朔竊瑤台無燭素娥明
吾儕樂事知多少聽取霓裳第一聲

馭象文殊跨鶴仙朝滄東海莫西天宣流妙法來金鳥
遊戲神通放木鸞花散諸天香入座定回丹竈火無煙
安排一雨穿雲屨又是蓬瀛路幾千

純陽爛醉李仙跛齊唱歸來踏踏歌檀板數聲滄海闊

梅花一曲彩雲多青牛老子誰能識黃鶴仙人事不磨
風馬雲車一飄忽龍華有會願重過

擬陶

莊生解齊物老氏貴葆真人生一世間渺若陌上塵放
曠聊自適懷抱日以新茅屋四五間取足蔽吾身飛沉
有定理焉用勞心神不知養生術徒嚙華池津

八指頭陀詩集卷之二終

入指頭陀詩集卷三

釋敬安寄禪

戲題黃蓉瑞秋柳詩後

丁亥

黃郎美少年著身青雲端揚帆下洞庭驅馬入長安青
青章臺柳裊裊春風寒柔條不可折請君霜後看

初春遊碧湖亭

獨居殊寡歡緩步出郊垌春陽布微和柳色縈新青良
辰入懷抱清賞臨湖亭啟戶縱曠覽開襟襲芳馨棲煙
鳥鳴條潛波魚躍萍興洽樂不淺慮淡神愈甯遠岫斂
夕景澄潭浴繁星眷念林壑美願言屢重經

宮詞擬齊梁體二首

東風扇綠草陽谷氣先和瑤池春溜滿芳樹雜英多
曉日開宮鏡飛泉鳴玉珂佳人行樂罷半醉朱顏酡
日暖昭陽殿花飛上苑春楊枝學腰舞柳葉畫眉勻
芳筵沸瑤瑟畫棟落珠塵興闌聞唳鳥淚濕紅羅巾

感遇二首

桃李媚妖容託根在巖阿陽春二三月芬芳一何多
枝條日以繁羣鳥聲相和榮華豈不好其如憔悴何
孤松秀冬嶺丹桂馥秋林豈無霜雪摧自有歲寒心
荆棘來途庶免樵斧侵

丁亥三日陳伯嚴涂穉衡禊集碧湖

天天桃始華融融日初麗
碧湖風日佳良辰肯虛逝
軒蓋紛如雲言修會春禊
春林恣幽討孤亭喜新製
湘流環前汀嶽色隱雲際
廣筵列肴楫芳尊襲蘭蕙
時鳥宣法音微言契真諦
旣愜少長情緬懷永和世
古今若轉丸風流復誰繼

贈徐郎中樹鈞

得句何須手八叉南州名久籍
京華喜來古寺瞻靈鷲
閒立斜陽數暮鴉詩思近迷湘
渚草夢魂寒繞上林花
春來又動探梅興童子提壺兩髻丫

招徐叔鴻郎中李公孫伯彊呂仙樓看雪

積雪浩無際登樓望眼寬
饑禽爭樹墜遠岫倚天寒
何忍獨爲樂還期人共歡
寄言高卧者來向畫中看

雪中酬徐叔鴻郎中見懷之作

野寺罷迎送孤吟對碧峯
忽聞白雪唱遠答上林鐘
斷妄諸根寂觀空萬事慵
惟開蓮社會思與謝公逢

送友人入蜀

草綠長沙渚淒然送汝行
微官休自恥萬里且孤征
日落黃牛峽江流白帝城
到時應有淚不獨異鄉情

與淡雲和尚夜話

十年俱老大一見一傷神白髮幾人在青山入夢頻兩
行鐙下淚三載病中身何日嶽雲裏與君還結鄰

贈饒十三

故人獨我厚相見每依依嗜左近成癖論詩真入微雖
云羅憂患長下讀書幃努力青雲器休言與世違

贈陳伯嚴

陳侯亦洒落對酒每高歌好客黃金盡論交白髮多雲
深三楚樹夢繞九江波乘興且行樂浮生能幾何

將歸衡山別常靜法兄

塵居性不適又向嶽雲歸敢道世緣薄空知定力微不

堪孤棹返長與故人違前路休相憶春山筍蕨肥

送雪溪上人歸雁峯

年少易爲別此別淚沾衣往事空回首春山晚獨歸白
雲迷遠望明月入禪扉惟有相思夢隨君入翠微

春草

年年原上望惟汝獨先榮已入西堂夢重傷南浦情燒
痕看漸沒屐齒踏還生春色又如此王孫尙遠征

四月十六陪茗香翁湘綺先生泛舟碧湖

勝侶忽相引扁舟泛碧湖江山今古在身世水雲孤法
樂自清妙禪心寧有無愛茲泉石好還約飯秋菰

喜黃芷船至

故人久不至相見一開顏脫略形骸外
嘯歌天地間移
琴臨綠水把酒對青山惆悵日云莫
煙鐘送客還

贈饒文卿

老作諸侯客高懷與衆殊隨身一劍在
對酒片雲孤白
社歸何晚青山看欲無年來翻愛靜
時與道人俱

送譙笠山之粵

之子忽言別征帆指粵東關山成獨往
身世信飄蓬古
驛蠻煙外秋濤野寺中衡陽無過雁鄉
信若爲通

六月初二日吳雁舟招予及黃蓉瑞飫勤
昆仲集

八
廿五日
言集卷三
四三
碧湖亭餞常秋曹石鄰入都

羣公方餞別余亦出林行高閣一尊酒扁舟萬里情相
期存古道不用恥微名誰道長安遠南風五兩輕

懷周燮墀蜀中

不見周公子相思又幾秋可堪千里別還憶昔年遊湘
渚木初落巫山猿夜愁遙憐望鄉意未敢倚高樓

題羅肫甫石潭別墅

泉石殊清曠主人幽興宜秋荷新雨後高柳早涼時月
出虛齋靜風來曲院遲茲遊樂不淺還與菊花期

重過楊家橋二首

寂寞桃花無主開
舊遊回首不勝哀
傷心二十年前事
曾爲阿爺買藥來

照水朱顏半已凋
春風依舊柳千條
棲鴉數點斜陽裏
不忍題詩過此橋

夜遊袁叔瑜瑤華山館

懷抱鬱不展
城居多煩喧
念我同心人
日莫遊茲園
路滑蒼苔滿
蟬鳴綠陰繁
荷香散暑氣
皎月懸清尊
意愜感長往
喻盡理孤存
結念屬雲海
鼓枻浮湘沅
乘煙共遐舉
棲壑息營魂
長謠空明際
佳期與子敦

六月二十八日出小吳門沿溪行至龍潭宿李真

人廟書寄陳伯嚴羅順循

城居苦炎鬱出郭忽超曠雲霞煥朝輝山水發清尚
蹇條息綠陰援蘿陟青嶂麋峯遠崢嶸龍潭晴蕩漾
仙館棲百靈崇臺越諸障吹萬理自齊得一神乃王心迹貴
沈冥世情任欺誑松喬去已遙余懷誰與亮

顯宗居士竹蒲山房小住

林巒含暝色樵徑罕人蹤寂寂一蟬語蒼蒼萬木重
寒泉生斷壑涼月透疏松愛此草堂靜惟聞野寺鐘

贈黃大蓉瑞

萬古傷心淚誰能共汝揮惜花情眷眷對酒思依依祇

應聞道少莫恨賞音稀東山白雲裏期君共採薇

古意八首呈寶覺居士

孤雲匿神照衆鳥焉能窺一爲下界霖惻惻使心悲黃
鶴不與侶青松時見譏物我既平等毀譽情無移朱門
雖自榮視之如茅茨悠悠千載上道林眞吾師

丹桂生幽巖歲莫懷苦心微風發馨香清陰結高岑皋
蘭云可恃奄忽霜露侵因之慕高潔願與棲深林

皎皎牛女星盈盈隔一水凝昏被四野機杼亂誰埋圓
月吐清輝燭物無表裏浮雲一以蔽歲莫情何已
矯矯雲間鶴泛泛水中鷗浮沈雖異趣與世俱無求如

何爵羅者山澤亦窮搜奮翅起高飛豈不念同儔願與
神風會逍遙俱遠遊

西山有嘉樹華葉何葳蕤芬芳不終朝摧折委路歧行
人爲躑躅飛鳥爲鳴悲本微擇地明今日當怨誰

孔雀從東來結巢瓊樹顛音響一何妙毛羽一何鮮棲
遲戀美蔭弋者伺其便一彈墮雙雄一雌飛不前悲鳴
作人語覆卵幸見憐

寡鵠將三雛歲晏未遑止斂翼方徘徊忽有金丸懼三
雛羽未成一身豈能顧念此痛中腸涕下零如雨

人生處一世樂少苦恆多童顏忽已改不忍見恆河故

人棄我去零落歸山阿而況骨肉情哀痛當如何

望湘樓晚眺

雨後雲猶濕高樓望若迷亂帆湘渚北落日橘洲西獨
鶴棲難定饑烏晚更唳憑欄何限意惟見月淒淒

禮岐山恆志老人塋

西風一蕭瑟落葉滿秋林碧蘚侵階長青松覆塋陰空
聞遺教偈誰識不傳心獨禮虛堂月無言淚滿襟

秋夜寄友人

蹉跎二十載學道竟無成白社聚還散青山期獨行秋
階百蟲響午夜一燈明茲意共誰語寥寥憶友生

題袁叔瑜悼亡詩後

傷心甯有此而我亦悽然愁絕哀蟬曲淒涼錦瑟篇蠻
煙縈舊夢夜雨入孤絃可恨空閨月秋來分外圓

贈別曹悟生

與君一日住交勝十年深正契水雲性其如江海心涼
秋悲落木湘上惜離襟惆悵高樓笛偏吹出塞音

九月三日陪寶覺居士吳雁舟謁衡嶽廟舟次昭
潭微霜襲林初月吐曜欣然成詩

昔余癖雲水靈嶽屢瞻謁矧茲勝侶延幽興益清發江
楓色始丹澤蘭芳未歇輕舸漾漣漪逍遙度城闕神風

揚驚濤坐卧忽超越羣嶼互向背頽陽屢明以汀火亂
繁星渚煙媚寒月水宿聊淹留真賞在林樾

登空冷巖和杜工部次謝靈運七里瀨韻

舍舟運神遊登棧眩奇眺洲渚屢旋複巖石咤危峭雲
竇滴餘潤洞隙納微曜鑿險若神工履陰疑鬼嘯遺物
奏玄功觀空得要妙旣愜青霞心豈顧白衣誚黃屋羅
英靈滄洲隱漁釣取舍各有宜殊音自同調

舟中呈寶覺居士疊前韻

運心恣冥遊流目縱遠眺浮杯歷滌洞攀蘿陟奇峭客
塵方外遺神光發內曜旣杜毘耶口亦薄蘇門嘯辯河

入子豆附言集卷三
息諍訟理窟得玄妙南嶽爲我湧北山豈余詣四海納
微漚六鼇歸一釣請謝河伯言爲君彈此調

舟中望嶽用謝宣城將遊湘水尋句溪韻

輕舟縱洪濤迅若挾兩螭將探靈嶽異結念南山垂憩
汀采芳蘭倚棹弄清漪風厲帆逾駛石激水分歧雲樹
紛漠漠煙岫影離離興因三秋發賞逐九面移赤蓼擢
風條朱果耀霜枝自契中觀理寧爲外物縻誰動臨川
歎逝者有如斯

步月至嶽市

連辰倦水宿舍舟果幽尋夕景淪西岡微月吐東林鐘

鳴嶽市近犬吠寒煙深與來神無疲事往感在今素髮
驚始見青陽不重臨哲人去已遙慨然傷余襟

登祝融峯

不盪雲海胸焉壯平生觀明發犯霜露豈不憚嚴寒羊
腸既曲折鳥道亦旋盤俯窺懼霧豹仰視慚風翰振衣
一長嘯誰謂行路難憑高豁遠眺天地青漫漫洞庭皎
素練滄海躍紅丸遙川六龍舞遠岫千蠶攢星辰爲我
珮雲霞爲我冠嶽靈視余笑招邀敦古歡迴矚人間世
喟然起長歎

尋蓮峯方廣寺

佳辰展宏抱超然運神足策杖循荒塗披蘿入浚谷林
隙漏微陽苔磴繡古綠丁丁聞伐木隱隱辨麋鹿巖高
岫重疊澗曲水洄洑陰壑蓄雲氣深洞伏龍毒經臺構
嵐岑精蘭闢巖隩斷碣委荆榛空庭森柏竹梵籟緩歸
趣羣黝眩奇矚揮袂謝山靈賞心於此獨

宿石澗紫葢精舍

山路條已暝余意方適然攀巖眺落景倚樹挹飛泉旣
歷煙蘿倦還就雲窟眠松林月皎皎石澗水濺濺觀聽
兩俱冥寂照生空禪遊心太始初不知有物先

福嚴寺

招提闢梁陳靈異屢棲託陵谷迭遷變龍象繼寥落寶
樹旣潛輝法源亦枯涸伊余乘微因聞道性所樂奈何
去聖遙譬如隔日瘴懷古情徒殷撫今念彌忤高山空
仰止迦陵不可作

磨鏡臺禮大慧禪師塋

尋幽不憚遠涉險趣彌深峩峩丹鳳岡鬱鬱青松林誰
謂導師逝林木演圓音鞭車喻奧義磨鏡垂良箴我來
肅瞻禮法雲靄餘陰繞塋周三匝憩樹披重襟境寂神
來舍慮息理自臨終期滅聞見結宇棲青岑

禮思大禪師三生塋

八排山詩集卷三
至人久埋照靈關復誰叩玄風扇區宇神塏祕巖數白
骨何足云所貴道不朽三生寧爾始千歲豈余後借問
幻化人知有眞實否

懶殘巖

巖巖山上石鬱鬱巖前桂
峩峩神僧居蒙蒙芳草蔽
象教昔陵夷如何隱智慧
長謝區中緣高結霞外契
寧從猛虎食不拭俗人涕
望雲有餘思高風邈難繼

清涼寺呈本師一首

達人貴宏道獨覺非所論
覺花馥心地智水湛靈源
誓然大智炬永破塵沙昏
拂衣舍衛國開講給孤園
豈不

疲津梁彌憫四流奔喬嶽蘊靈異中有甘露門非賢豈
能主惟德衆所尊人天一忻悅花雨何紛繁迦葉信小
果慶喜慚鈍根荷法各有任嘉會何由敦聊勉自化志
庶用酬慈恩

贈陳童子師曾

童齡具耆德頭角方崢嶸頻伽發妙響玉樹敷新榮道
由聚沙植義以分梨成好古興不淺鑑物智自明善葆
青雲器相期黃閣名

附陳童子和詩

天下多奇士山岡出蘭芝高禪志修已不爲世俗移

甘心守寂寞袞袞良足披苟非鴻與鳶焉能奮翅飛
閒居非吾願嶽遊爲子宜靈境絕妄念妙悟發新詩
感情亦何報援筆廣此辭

登碧湖樓

暝色起汀洲涼波吹夕愁雲垂洞庭野木落蒼梧秋歲
歲雁南渡年年水北流瀟湘無限意日暮且登樓

送曹五入都

寒風淒以厲孤鴻鳴不歇遊子欲何之離歌中夜發東
裝辭楚山揚帆向京闕洲曲望屢迷淚盡情不竭悽悽
澤畔吟皎皎江上月去住各努力毋貽歎華髮

贈無我道人

至人本無我所適無非真和光五濁內獨能超其神識
密賞愈寡照寂道轉新與來時染翰卽物理自陳悠然
南山下自謂羲皇民

呈黃飫勤

江河流不息邱隴日崢嶸俯仰宇宙間了無一可營於
心忽不樂涕淚爲縱橫旣嘆浮漚滅復傷流電驚勝因
勉自植妙道冀圓成皈心大覺前所寶非榮名

招王午樓碧湖齋集不至

夫君期不至悵望使余愁竟以雞豚美而貽藜藿羞千

人井田詩集卷三
林空落日萬木已辭秋獨有沙頭鷺依依爲少留

訪瞿芷桓不遇

每過問童子長云不在家寒花空映戶高柳自鳴鴉欲
去意還駐行吟日已斜所思人不見咫尺卽天涯

重晤瞿海如

久別驚始見開言心自悲方君多病日是我咏愁時滄
海橫流急青山獨往遲年來憔悴甚莫訝鬢成絲

夜坐憶龍大硯仙

夜深羣籟息靜坐入枯禪遙憶山中客聽鐘應未眠詩
成明月上花發綺窗前杖策誰招隱空吟桂樹篇

呂仙樓看紅葉期周郢生濩生吳孟管季澤昆仲
不至

日暮秋砧急高樓野望時雲低疑欲墮帆遠訝行遲把
酒問誰醉排愁獨賦詩坐看紅樹晚空與美人期

杪秋偕壽梅居士素蕉道香二上人遊麓山寺

麓寺經年別今陪數子遊野花寒更發庭樹葉先秋莫
靄四山合西風兩鬢愁平生愛邱壑向晚此淹留

送王瑞徵歸蜀

青城何處是萬里一舟輕因念關山遠彌傷離別情嶺
猿時斷續江鳥自逢迎歸看峨眉雪毋爲憶友生

送易懷清之長安

歲序已云莫，胡爲獨遠征。
關河分夕照，草樹入邊聲。
霜落黃山紫，春回渭水清。
長安行樂地，莫訝二毛生。

蕭希魯歸自江南賦贈

憐君意不適，歲晏復歸來。
欲問江南事，其如庾信哀。
壯心猶未已，華髮忽相催。
何用悲遲莫，清時方愛才。

秋日得郭菊蓀司馬書

黃雲莽蒼雁來疏，忽得秦中一紙書。
提劍十年爲客久，論交廿載識公初。
荒煙古戍唳山鬼，落日邊城策蹇驢。
聞道秋來歸思切，故山風雨夢樵漁。

自勵詩

驚風飄浮雲奄忽千里馳人生獨何爲守此百歲期春

華不再榮努力及良時懷安聖所咎忍進德之基

佛經以施

戒忍進禪慧方願力智爲十度

朝聞儻可遂夕死復何悲

劉山人希陶自都梁來齋集浩園卽席賦贈

歲莫苦無惊忽喜幽人來幽人罕塵事歲莫與我偕積
雪皎素豔寒鐙煖深杯雲霞發藻思氣象何寥哉昔年
江海客曠覽窮溫台餘情已飛越殘夢猶崔嵬憶余旅
浙濱微尙謬見推良會信有時愔蘊今始開相期方外
遊高蹈謝氛埃

八指頭陀詩集卷之三終

八指頭陀詩集卷四

釋敬安寄禪

雪夜過王彝臣都尉禮坤寓齋

風雪晚來急尋君獨叩門
翻枝鴉有影入夜月無痕
把酒自爲樂浮生何足論
停琴一靜坐相對各忘言

麓山對雪寄程六子大

晚來天又雪吟榻此中安
獨雀語高樹萬山生莫寒
偶從初地住思與故人歡
寂寞衡巖下誰知有懶殘

寄題茗公南泉淨業堂

十年辭衆去垂老慕西方
白髮歸心切青山引興長
伽

陵朝演法珠樹夜流光遙憶經行處含情望夕陽
穆廟諱日讀吳侍御可讀遺疏二首

鼎湖龍去日歲莫獨愁時已失中興主長留四海悲西
風 惠陵晚落日薊門遲欲共忠魂語含悽祇淚垂
國步艱危際孤臣涕淚中前星虛帝座 七廟起悲風
丹檻攀無及蒼梧怨不窮萬方同一哭誰復殉遺弓

張嘯石歸自閩中賦贈

故人忽以至握手思依依已作三年別新從萬里歸且
尋舊社約莫恨壯心違時事嗟何補青山共息機

送陳居士麓岑歸里

畢竟誰知已逢君長不言甯從遠公社恥謁信陵門不
惜千金散誰懷一飯恩天寒歎歸去風雪滿江邨

題十竹君軒

戊子

幽軒種十竹孤冷與君宜把卷常枯坐逢人欲語遲雜
花初滿樹春水始平池乘興惟須飲毋爲嘆鬢絲

二月朔日舟次桐溪精舍夾岸桃花迴非人境

達人貴懸解胡爲自羈束辰興梵課餘理棹湘江澳日
華釀朝溫春波生微綠南陂煙忽開西麓翠可掬晴鳥
喧芳洲夭桃媚幽谷靈境絕攀緣妄迹競馳逐息心此
戾止何用昇喬嶽

桐溪禮暗燈覺道二公塋

嚶嚶春鳥鳴汎汎夕流逝倉卒一紀餘哲人繼彫萎巍
然悉堵波荆棘忽以閉悲來匪由識哀極轉無淚旣懷
寂滅樂彌念形骸累雲霞暖餘映竹柏凝寒翠金棺一
埋照水石徒清麗

辭上林寺法席呈法門諸公一首

大道久淪沒賢聖亦肥遁振興在來哲余也誠不敏遲
迴一載餘顧瞻忽自哂猥荷高明知未證無生忍揮袂
謝浮雲乘流逐驚隼永絕白社遊逝隨玄豹隱平生煙
霞心庶得巖下泯去住各有宜愚懷或見憫

將緣湘水探九疑諸勝慨然有作

聞居豈不樂心恆懷百憂春風來何時洲渚緣已稠因
辭紺園侶高唱蒼梧遊暫與塵境遠忽令耳目幽雜英
何紛紛棹歌亦夷猶仰視孤飛鴻俯瞰近水鷗感此遺
世慮道在復何求

湛湛湘江水亭亭衡嶽雲重華去不還千載愁人魂春
竹染淚迹幽蘭徒清芬聖遊豈可追九疑尙嶙峋逝將
掇瑤草永用秘吾神

擬古一首獻海公

時雨潤八表誰謂澤不周日月光兩儀焉燭重巖幽人

生昧前識萬事難豫謀賢愚既竝世涇渭亦雜流何山
無蘭蕙荆棘蔽以稠達人竟何施守道固不憂立觀物
寧滯神解智自由逍遙寂寞濱身世猶虛舟

之九疑緣湘行夾岸峭石飛泉蒼藤古木書寄陳
伯嚴羅順循并柬雁舟蓉瑞昆仲

唐虞去未遠高步猶可追方舟溯三湘夢寐懷九疑神
颺從東來仰視飛雲遲洪濤鼓巨壑陰岫無開時蘭蕙
吐芳氣松柏挺高枝幽鳥出谷鳴孤獸索羣馳念茲山
川遠貽我友朋思勝遊不克偕中道使余悲弔影千巖
間慨然歌此辭

山行有序

山行既暝遠望茅茨隱約林表援蘿上一道者出
貌甚癯揖余入具野蔬共啖不交一語禪誦自若
時斜陽告夕皎月在窗輒題數句以娛良夜

松風始微動山鳥猶未鳴有客資神往高咏發幽情荒
塗莽荆榛樵牧亦罕經靈源窮欲盡忽聞犬聲道人
歡客至佇立候柴局設食羅野蔬志意殊真誠曖曖陽
已微皎皎月孤明心境兩俱寂泠然契玄冥

過衡陽退省庵

日落瀟湘晚重過舊草堂幽篁多美蔭老樹發奇芳短

八掛頭陀詩集卷四
四
髮心猶壯扁舟意自長獨憐江海去未待晚菘嘗

東洲訪江肇甫山長

有鳥鳴喬木起余求友心浮舟度煙水策杖入雲林小
閣焚香坐清言見道深欲移石床近還就綠蘿陰

謁黃庭觀

偶乘獨往意來謁魏元君谷暗松杉合天清鸞鶴聞靈
芝含秀色仙石繡苔紋坐久諸緣息晴空生片雲

訪福巖寺立妙上人

古路逢樵問蒼茫萬壑雲偶尋高隱士重禮祝融君樹
老無年代心清滅見聞浮名累人苦煨芋莫輕分

花藥寺

花藥阿蘭若重來二十年
紺園空宿草碧殿鎖寒煙
零落嗟今日艱難憶昔賢
瀟湘無限意惆悵夕陽邊

贈易與凡

拔劍高歌對酒卮
酒酣爲說戍邊時
夢隨關月還家遠
馬踏河冰出塞遲
青冢至今餘漢碣
黃沙終古陷秦師
憐君萬里封侯願
贏得西風兩鬢絲

秋夜寄張聽侯仲卣昆仲

高枕不成寐孤燈暗忽明
一身常足病萬事易關情
夜雨愁仍滴草蟲寒更鳴
故人今夕夢誰與話平生

入井田詩集卷四
王
送周魯衡之華容

送君不忍別攜手暮雲端
湘上雁初過洞庭波始寒
茲行忽異縣誰與結同歡
卽此堪惆悵休歌客路難

贈周生

滿眼風塵色憐君獨此過
浮生同旅泊失路未蹉跎
誰道朱門貴其如白髮何
幽棲吾所願還與覓煙蘿

邊將

白首尙談兵恩深任死生
大旗翻亂雪歸馬怯空城
漢將日寥落匈奴掃未平
黃雲連朔漠辛苦且長征

歎逝詩

西方有佳人灼灼桃李姿
言論吐清芬顧盼生光儀
良辰恣遊宴不惜千金資
馳車五陵道豪貴相追隨
自矜常美好歡會無窮時
一朝隨物化萬事徒傷悲
神識尙未泯高墳已纍纍
念此五內熱涕下如縷縻

雨後秋懷

山中一雨過池樹早涼生
坐石忘朝夕看雲憶弟兄
歡愉猶昨日寥落不勝情
寂寂千峯裏惟聞猿嘯聲

日莫過何棠蓀廣文宅

塵喧忽以寂籬落似深村
雁度斜陽外蟲聲秋草根
霜畦寒菜色茅屋暝煙痕
近市亦成隱何須入鹿門

朱嶽船員外輓詞

寒霜肅以厲蕙草亦隨萎人生無貴賤黃泉盡來歸榮
名雖云寶神識安能知惟德乃不朽千載常如斯哲人
抱幽衷滅智甘棲遲作善匪望報處盈恆若虧艱哉憫
物情至死猶依依鸞鶴旣高翥緬想平生儀永爲國士
歎長貽鄉閭悲營魄儻見存鑒此薤露詞

寄懷陳庾山江南

秋風吹白蘋遠望一傷神天地正搖落江湖憶散人經
過桃葉渡自惜柳枝春借問南朝事誰歌玉樹塵

送周彥昇歸通州

開福古蘭若相逢話落暉清遊曾幾日惆悵忽言歸湖
上秋山晚淮南木葉稀送君臨極浦惟見片雲飛

與表兄張五話舊

天涯一分手相見十年遲親舊復誰在悽然心自悲與
君俱老大忍話少年時明日拂衣去青山何處期

送友人歸淮上

曉風吹雨過兩岸荻颼颼淮上君歸去江南我舊遊不
堪聞落木俱是有離愁寄語故人道別來今白頭

詠懷詩十首

昔余慕靈異南遊經九疑復泛蓬山舟遠與浮丘期隆

冬草木茂朱華何歲蕤湘靈拊瑤瑟海若揚桂旗仙人
隔煙語貽我瓊樹枝云此最吉祥佩之忘憂思長跪謝
仙人此物非我宜

我本自在仙一念落人間人羊旣更易識性亦推遷捨
身復受身來去如輪旋白骨何峩峩高於毘富山已忍
多生慟樂土何由還

疾風揚波濤起滅無端倪波波相續流甯復住斯須嗟
余久沈淪泊然無止依真源失湛寂誰能鑒淵微

步出城西門高墳何纍纍年深墳土裂白骨委蒿萊墳
傍哭者誰云是白骨兒生旣爲死泣死亦待生悲哀哉

億千劫無有淚絕時

弱齡逢喪亂田園遂蕭條坐爲衣食故豪門屈見招顧
無五斗祿甯折壯士腰拂衣謝城闕高步淩風霄金仙
雖云遠靈鷲尙岿巖超然方外遊永用泯塵勞

去歲展先塋路憩桑樹邊村老向我言此桑齊汝年汝
父昔在時耕此桑下田人牛今無迹茲意復誰憐感此
不能語涕下如流泉

余生秉微尚塊獨甘雲棲幽涂盛荆棘蘭蕙何離披鴟
鴞相叫嘯猿狖復鳴悲真如旣不變萬有徒紛馳將捨
有漏身一飽豺虎飢

吾欽忍辱仙運心仁且慈手持如意珠百劫行檀施宏
法亦已勤六師謬見疑冤親普平等焦芽同時滋智果
既圓成永爲天人師

少讀高僧傳抗志希遠公澄神五峯表滅影二林中遲
回虎溪月緬想劉雷蹤斯人邈千載蓮漏猶未終涔涔
潯陽潮汨汨恨何窮

我聞安養國賢聖俱棲遲講堂極壯麗行樹相因依湛
湛七寶池矯矯珍禽飛金繩界道明天樂隨風移衣食
應念至不假人力爲文殊既戾止慈氏亦來儀長揖三
界苦永絕四流悲逝辭五濁世金手引同歸

九日寄程子大承順

今日登高處何人共舉杯甯知風雨夕忽有脊令哀鄉
信愁中斷蠻雲瘴不開殊方爲客苦歲莫儻歸來

湘上吟

江寒楓始落天遠雁初來古木雲中出青山雨後開城
臨賈傅宅秋冷定王臺日暮湘江水如聞鼓瑟哀

靖港紫雲宮明淨法師建鏡湘樓成宴集道俗王
先生壬秋爲之記余以事不與作詩寄題

靖港古屯戍熊湘資咽喉帆航接洞庭津鼓連橘洲開
士審其要排雲建飛樓秋霞澄夕陰月影碎川流良辰

集道俗廣座羅珍羞奇文耀華藻立論豁昏幽茲會吾
不與情往如同遊川塗咫尺間來去千萬舟取意各自
適謝彼波中鷗

崑崙篇

醉卧崑崙石萬年爲一曉覺來觀蓬壺羣仙迹如掃碧
海揚驚沙白雲抱空島悵然懷舊歡無心掇瑤草

過賈太傅故宅

三載棲遲地堂空夕照斜賈生去已久庭樹尙能花夜
雨唳秋鬼靈風集曉鴉淒然芳草歇懷古一長嗟

呈義甯廉訪

達人抱玄朗風誼宿所欽經綸乘運啟珪組非公榮湘
衡美餘蔭河浙騰英聲任鉅志方展才大謫易成解龜
遂初服屬念在巖耕 明廷眷高義迴車遵王程黃河
不可渡濁浪何崢嶸顧瞻斯民艱彌傷遲莫情忘懷道
益重適已物自輕請從邱壑遊聊用謝浮生

擬謝康樂維摩經十譬讚八首

聚沫泡合

覺海性元澄云何泡沫聚境界風所吹虛壑自相鼓認
漚豈全潮識流匪異體誰爲達觀者真源亦無取

箴

晴虛本無翳陽燄何由生擾擾甯暫住渴鹿徒馳情真
空任起滅明性無滅增智者鑒其微元同一見精

芭蕉

芭蕉本佳卉綠葉方叢生內心匪堅實外觀亦清英未
霜已零落誰憶昔時榮

聚幻

幻聚眩流目衆巧歸我神能爲城郭狀亦現男女身愚
夫昧取捨橫復生愛瞋逝者復如斯誰言此非真

夢

孰謂識性同同寢各異見妄境故無恆真如了不變夢

覺俱強名好惡誰與辨
哂彼執著人尙爲浮物戀

影響合

大道寓影響誰復知此理是中無實性羣有妄相似
本自絕名言云何立彼此運心平等觀一任空華起

浮雲

浮雲匪定質變幻誰能測
氤氲翳太虛飛散窮頃刻
含潤若有施觀空了無得
前塵雖云妄轉用資神識

電

寥寥天宇廓流電時一驚
奄忽不可見神迅誰與倫
狂心儻可歇智眼自圓明
勿用世間想貌彼虛空情

西方三聖讚三首

無量壽佛

猗歟無量壽正覺果圓成數劫恆沙前法藏流英名懷
道薄欲樂棄國遺尊榮旣揚精進幢復轉大願輪莊嚴
淨妙土智者忻往生本無二乘器甯有三惡情痛念沈
淪苦未聲涕先零願垂白豪光鑒我皈敬誠

觀世音菩薩

大士得法忍曠劫無惡心尋聲拔苦蘊振海吐元音甘
露茁智種慈雲生遠陰妙覺誰與證圓通聖所欽逝隨
神風往逍遙洛伽岑

大勢至菩薩

三祇嚴智果神悟忽以超虛空既消隕大地亦動搖舉
足越沙界迅若乘驚飈寶光燭身根塵垢應念消

鄭州河決歌

嗚乎聖人千載不復生黃河之水何時清濁浪排空倒
山嶽須臾淪沒七十城蛟龍吐霧蔽天黑不聞哭聲聞
水聲 天子宵衣起長歎 詔起師臣出防捍帑金萬
鎰鎮洪流黃河之工猶未半精衛含愁河伯怒桃花春
汎益汗漫明廷下詔罪有司有司椎胸向天悲吁嗟乎
時事艱難乃如此余獨何心惜一死捨身願入黃流中

八指頭陀詩集卷四
抗濤速使河成功

題王尊農觀察臺警夜渡圖二首

神州論險要臺嶠信孤懸
海闊魚龍夜心傷戰伐年
曾聞木罌渡竟過水雷前
虎穴身能入英風尙凜然
小醜甯難滅王師豈在多
初傳橫海捷仍許郅支和
太息援邊詔空揮返日戈
披圖話陳蹟淒惻漢山河

八指頭陀詩集卷之四終

八指頭陀詩集卷五

釋敬安寄禪

余所居羅漢寺前有方塘一畝蒲柳交映荇藻紛
披尤多菱實向無蓮種今夏紫莖綠葉無因自生
照影千花彌望五色信象教之嘉祥亦淨業之冥
感也因名曰瑞蓮池爲詩以紀之

己丑

湛湛方池水芙蓉未肯生如何污泥中一旦吐芳榮清
氣遠逾馥妙色難爲名豈伊神所誕非余德之馨援筆
紀嘉瑞聊用悅羣情

修上人禪房訪程商霖不遇

孤城臨水斷野寺向江開偶訪青雲客言尋白社來空
齋寒莫雨遠岫隱輕雷獨與山僧別扁舟泛月回

六月望日同白香翁游江甯初發衡陽作

丹鳳棲南岳高唱莫與同感彼求友聲振翼凌遠空爰
辭山澤居翱翔大江東伊余忝陪從茲遊冀奇逢人壑
玩洪瀾名山蔭茂松將隨性所適誰云吾道窮

七月十九乘淮慶輪船發長沙

涼風改炎序明河澄素秋開襟運神往時哉不可留飛
輪下荆吳解纜辭橘洲波濤吐洪音靜聽心悠悠千里
坐超越神迅罕與儔委懷於元漠非但美遨遊

洞庭

島嶼連巴蜀風濤界楚吳水長帆影怯天遠雁聲孤落
日自明滅遙山時有無黃陵秋草徧何處是蒼梧

洞庭舟中次白香翁原韻

洞庭信云廣茫茫吾何向激電越洪流忠信宿所仗風
雲忽異色波濤自相盪空碧澄遠流虛翠潤寒嶂遊龍
喜深潛翔雁悲寥曠伏枕聆驚瀾憑虛玩秋漲派分九
江遙氣接三山王返觀契靈異心目得融漾

望君山

洞庭秋望水冥冥猶是君山一髮青今夜重湖波浪靜

月明吹笛弔湘靈

黃鶴樓故趾

寒霜淨汀洲微雲靄江城黃鶴雖已去人猶愛其名同
居欲界中誰云得長生烈火焚崑崗頽然無遺楹徒想
瓊樓麗詎聞鐵笛聲朝霞散餘綵秋月懸孤明羽人復
何歎太上在忘情

禰衡墓

漢道昔凌遲奸雄據要津賢達不任世明哲思保身哀
哉禰正平殺身豈成仁羽毛旣爲禍文彩安足珍我來
荒洲上懷古薦芳蘋秋草萋復綠千載爲沾巾

伯牙臺

至理本無言至聽本無音誰能返耳根聽弄無絃琴子
期雖復生島由知我心日莫臨高臺寥寥獨行吟真趣
貴自賞浮響非所欽

望廬山

縱棹隨神風浩蕩洪波間引領望廬嶽悠然開心顏秀
色信難名靈氣吐自然五峯媚雲表巉絕誰可攀緬懷
遠法師高步太元年陶謝尙返駕澄什甯比肩千載沐
餘潤猶能洗塵緣瞻霞想神足臨流哀逝川玄棲儻可
必妙蘊當能宣

湖口弔高伯足

高生才調冠三吳爲問人間尙有無
今日卻過湖口縣
亂山無語夕陽孤

小孤山

衆流滙巨壑孤岫削中川
猿鳥墜絕壁宮闕基層巔
蒼翠自成媚丹霞不能鮮
翔仙契幽島潛蚪玩神淵
朝雲氣靄靄夕月影娟娟
旣愜方外趣彌薄區中緣
莫咏涉江操當知捨筏賢

九華山

九華實仙都重巖蘊神宅
弭棹倦驚濤瞻雲慰良覲
遠

抗廬霍高兀若星辰偈霜壑流曉丹秋巒散遙碧遠近
生異容天山共一色伊余慕肥遁逢山愜幽寂徒眩耳
目奇未就煙霞息思欲御冷風曷由生羽翼立關寧我
局靈境冀孤厯

東西梁山

江南鎖鑰扼雙門一樣青山各自尊莫恃當關能據險
秣陵風雨共誰論

莫愁湖

湖上微風拂檻清行人猶愛莫愁名鬱金零落芙蓉老
簾外月明秋水生

鍾山經誌公塔院

蘭若居高處孤遊愛晚登
長松夾亂石峭壁走枯藤
獨禮空山塔惟餘古殿鐙
如何雲窟裏不見六朝僧

夜遊清涼寺登掃葉樓

樓爲昭明太子讀書處

一磬墮冥翠高樓倚月明
天空憐雁度山靜覺寒生
雲氣迷鍾阜秋潮撼石城
時聞清梵發還似讀書聲

妙相庵

百戰無殘壘巍然獨此存
古藤猶鐵色舊碣尙苔痕
有相能逃劫無爲道益尊
臺城落日裏多少未招魂

送台州太守成梓臣歸里

達人慕肥遯解組遂初心
白首辭台嶽清風歸舊林
只憐飛鳥倦未許入山深
暫向谷中隱黃鸝有好音

贈張文叔

張生信奇特亭亭青霞姿
韜光衡門下世俗焉能知
嚴霜悴眾草孤松卓高枝
積善雖云吉行道亦有時
但守固窮節毋爲歲寒移

贈劉康侯

劉公本華胄而無紈綺情
在眾恆守獨處盛能遺榮忠
義雖自許肝膽爲人傾
域中韞奇氣海外馳英聲
論交愧余淺未得盡平生
凝神吐微詠聊用寫丹誠

贈陳曷秋

陳侯真坦蕩少年掇高科驅馬出京門意氣凌三河雄
劍一奮擊海水爲不波日月揚光采丹鳳鳴相和求賢
何必廣得士豈在多幽人愛奇節雲中發嘯歌

贈唐召皆

唐君性幽靜和藹抱沖襟微言吐立理清風穆重林旣
振金門策亦愜青霞心誓飲廉泉水甯憩惡木陰孔墨
道一貫至聽無異音苔岑諒同契歲莫當來尋

陳曷秋還湘賦贈

日莫千門靜天空一雁飛那堪異鄉客復送故人歸建

業孤帆遠楚江秋雨微禪心本無住何事欲沾衣

送黃茂才歸長沙

西風吹暮雨忽作北窗涼當此悲秋夜聞君歸故鄉洞庭方落木震澤始微霜千里豈爲別同茲明月光

重遊天童寺

不到天童寺恩恩歲六週甯知孤衲影復入萬山秋照水驚雙鬢班荆憶舊游平生輕去住此別意悠悠

過徐酤仙墓

落日荒村裏來尋處士墳儻君猶在世與我細論文挂劍嗟何及遺琴愴欲焚平生知己淚霑灑向寒雲

甬江與李子仙茂才話舊

六載江湖別相逢鬢已班故人悲宿草

謂屠繼美馬文齋諸君

往

事話空山有淚皆成血無家何處還天涯重分手戚戚
慘離顏

哭與了和尚二首

憶昔俱年少岐山問道時看雲同枕石洗鉢共臨池暫
指青松別仍爲皓首期舊遊今寂寞回首淚如絲
五月瀟湘岸含悽送汝歸那知揮手去永與賞心違世
事嗟難定浮生念轉微門前雙杏樹猶挂舊禪衣

雪竇妙高臺宴坐有悟

靜坐忘言說冷然契此心莫天孤雁影滄海一龍吟妙
悟有超越曠觀無古今獅絃空自鼓華嚴經云如取獅
子筋爲絃鼓之衆
響俱絕誰爲賞圓音

十二月二十八日由浙歸衡陽羅漢寺示衆

吾道難諧俗寒山祇自歸詎思滄海事終與素心違絕
巘宜雲卧長空任鳥飛惟憐陵上柏寒翠映余衣

庚寅正月十一日與旨密清虛妙智法林諸道人
飯修庵主廬二首

偶攜紺園侶來扣蒼巖扃江霞澄遠影松雪墜寒聲同
殮香積飯靜禮佛名經冷然鐘梵寂復踏漁歌行

入抄豆門詩集卷五
山寒草木瘦苔沒虎豹踪始憐人境隔惟與川途通幽
岫蓄新翠春橋卧綵虹了知真諦義不欲強言空

正月二十六日由衡陽至長沙四首

孤舟仍遠涉落日悵離羣寒嶼明微雪春波聚細紋乾
坤信虛棹身世薄浮雲自笑平生事旁人未遣聞

高枕滄江夜凝情默語時往來徒自苦天地欲誰私細
雨孤帆溼寒鐙春夢遲百年猶旦莫擾擾復何之

野寺鐘鳴寂江皋水氣沈曉星寒欲墮旭日暖初臨大
覺誰能證虛空不住心欲知清淨義試聽棹歌音

江鳥還迎櫂山桃又發花近村聞野碓隔水辨漁家祇

訝春來早那知鬢已華渚雲開復合何處是長沙

次豁然戒兄見贈元韻

悠悠長沙道一別十七載相對鬢毛斑似覺山河改榮
名詎爲寶愛結誰能解太息同門者而今幾人在

法林小師禪靜圓修詩以美之

亦知身是苦妙解道爲尊諸妄消欲盡一真默自存霞
峯澄異綵玉樹秀靈根莫秘牟尼照須清濁水源

二月十五夜偕吳雁舟曹東瀛梅訪黃孟樂仲長
兄弟呂仙閣翫月時東瀛將同雁舟北征賦詩言
別因和之

佳人美良夜秉燭來虛堂飛甍麗丹霞登覽延清光圓
月吐華曜嘉木森成行春城蘊煙氣汀火生微茫憑虛
發長嘯意興何悠揚浮雲忽以至平陰合湖湘變幻在
須臾神識豈能將聞君碧雲唱感彼明月章清暉詎恆
滿勝游那可常誰云江漢廣我心與之長安得忘憂草
植茲衡山陽

送吳太史嘉瑞入都

有序

庚寅閏月雁舟太史北征臨別殷殷彌眷法侶
追思昔遊不能無述夫出處一也苟得發揮宇
宙彌綸彝憲卽事明真何在非道豈必空山迺

證圓覺昔人篤念友朋於其別也每有贈言顏
仲之賢魯乎尙已秦漢而降厥名詩詞蘇李河
梁匪直五言之濫觴抑亦贈別之初製也貧道
不學夙承雅契把臂予談已彌年載一旦遠適
能無黯然猥撰俚辭藉鳴離悃匪敢希蹤曩哲
亦曰勉崇明德云爾

幽人滅百慮眷茲求友情疇昔支許遊不異弟與兄論
道冥孔墨結志感精靈去住隨所遇皇路忽遄征有如
共命鳥一旦發離聲羽翼臨當乖浮雲勢難停丈夫旣
許國豈容戀巖耕黃鵠一遠舉高飛入蒼冥顧瞻舊時

人非山言集卷三
九
儔能不懷悲鳴神契亮勿隔萬里猶戶庭努力事明主
況乃值時清振采曜中天塵垢甯外嬰爲君樹松桂念
彼隆冬榮

題神鼎洪湮禪師道場

傳聞軒轅氏鑄鼎茲山巔草木靄深秀水石澄清妍汨
渚流足底洞庭橫眼前望遠意無限登高心自憐精藍
虛結構鐘梵益淒然洪公寂已久妙意誰能宣

酬黃夔修履持二童子詩一首

矯矯雙鳳雛和鳴多好音含靈徵明德垂綵耀高岑修
篁吐奇實孤桐結清陰托身旣得所羣鳥皆欣瞻毛羽

雖未豐詎測凌雲心
援筆頌英芬聊用荅清吟

題長沙上林寺藏經閣詩

并序

上林常靜法師一真內蘊四德外流摩尼智鏡
媿茲圓照苾芻芬利方其柔潔爾憫大法陵替
微言將墜以光緒十五年持錫入都參求竺典
宰臣福銀公嘉其梵行以狀上聞報可并錫

純廟御書聯語鎮護山庭隆道宏宗邁於往聖
明年五月龍藏南旋洞庭駐波衡嶽凝翠甯謂
頽流覲茲殊勝因製伽陀用紀法喜

金容一西逝大法遂東流
昏衢朗智炬愛河濟寶舟長

沙古藩國騷客資淹留應真亦戾止講肆如雲浮哀哉
二千年法運猶未周如何獅子窟今成狐兔邱禪枝日
凋謝念茲深余憂幸有智者誕定慧崇前修妙諦融眞
俗平等齊恩仇乞食於京闕機辯驚王侯龍藏出天府
象教耀神州炎維賴以鎮篋戾爲之柔讚揚安可窮聊
用紀因由

題常人吉居士默庵詩一首

并序

居士和光五濁鼓枻四流抱質耽微順眞達俗
息言論之諍澄寂照之契非夫前覺孰能證此
因贈以詩

至人冥知見高館越塵障寂默證元常妙悟釋言相內
心貴自契外物靡所尙聖解儻不存俗諦誰能誑區中
得祕要焉用棲巖嶂

晨登雲麓宮望城中詩一首

并序

庚寅八月戊朔於麓山寺斷食越七日甲辰
漱齒鶴泉振衣雲麓俯視隔江城郭萬瓦明滅
流埃蒼紫時巖旭初晃松露猶泣頃之市聲隆
隆如聚百千蚊蚋一器中啾啾亂鳴甯謂人我
貴賤同異愛憎汨於其間嗚呼情生智隔想變
體殊覺王邈矣誰證幽旨神會所及爰詠斯篇

八十五
言集卷三
二
清晨警禪悟萬籟寂無聲振衣陟高岫林隙始微明遙
遙起煙火蒙蒙辨層城念彼氛垢中流欲多所營吾生
亦有涯所願學無生仰睇碧虛際悠然適余情

秋懷詩二首

秋風吹涼波寒蟲響哀音念此時節易憂來曷能禁萬
物靡恆盛二毛亦以侵平生五嶽志不復果幽尋俯仰
一室內孤彼巖岫深望雲資神理撫事愧初襟逝返元
冥棲庶契妙明心

我聞大雄氏常住靈鷲峯法會猶未散道樹仍青蔥淨
穢信懸隔精誠亮可通默坐運玄想恍與真儀逢金手

垂接引寶鐸霽昏蒙將隨神足往念彼樊籠中凡流不
俱濟聖遊安可從

麓山秋暝

碧天澄莫陰霜月出未高孤雲無定適衆鳥各趨巢息
此樹下影念彼塵中勞清賞莫余同良友詎能招幽途
成獨往一心爲神交

山近氣恆寒不知天已秋涼颼入庭柯木落遠山稠猿
鳥雜亂鳴逾覺館宇幽夜來新雨足溪水繞屋流真想
方在茲焉用尋丹邱

體雲和尚主席麓山寺詩以慶讚

虎岑吾祖席傳鐙喜有人遠飛雲外錫來禮定中身水
乳相投合經過不厭頻終當卧林壑猿鶴共爲鄰

感事二首

寂寥湘水上身世共誰論落日青山遠浮雲白晝昏衣
冠一時盛肝膽幾人存何日拂衣去千峯獨閉門

吾儕亦何事涕淚忽難收鶚鏡真成擘江河欲倒流可
憐豪俠氣虛作杞人憂鬱鬱夜難寐西風月滿樓

八指頭陀詩集卷之五終

八指頭陀詩集卷六

釋敬安寄禪

庚寅秋將歸衡山精廬次武陵陳伯濤見贈原韻
吟辭仙洞客歸掩嶽衡門靜聽寒猿嘯甯隨野馬奔松
蘿堪作蓋山市自成村窺人夜月冷補衲晚風溫相期
溪上石與爾話真源

還山後寄伯濤次前韻

古木蓋藤屋幽苔映石門乍聞一雨過忽覺百泉奔果
熟猿窺樹花開犬吠村田衣秋漸冷松火夜能溫鎮日
疑情坐誰來問法源

觀田家春耕晚歸

辛卯

詩文小道耳壯夫所不爲而我酷好之豈非大愚癡儻
隨大化滅榮名復何知辛苦一生內歐血誠可悲不如
田舍翁終日百無思所思在隴畝風雨無愆期草稀稻
苗秀眼前綠參差入秋望有成聊得遂其私但取衣食
足過此非所須善哉淵明言力耕不吾欺

中和日與程睫園過東洲講舍邀雷小秋羅雲巖
廖卓夫姚瑞磨游小羅漢寺作

春風一微扇草木含新萐佳茲微雨晴復與賞心攜鼓
枻溯洪流揚帆便輕颺洲渚綠方盈霞彩垂光儀講肄

集羣彥矯矯鸞鳳姿蘭蕙馥其馨德義爲之基洙泗若
可接孔墨道甯疑共美紺園游同禮天人師明鑑皎智
燄覺樹聳高枝境幽性所愜理勝情無疲良辰勿可諉
頃耳希新辭

題增法師講堂詩一首

和風悅余懷縱步芳春林巖巒蘊靈氣橘柚垂清陰法
師此棲趾精廬冠雲岑白業晚逾篤元根奧且深含花
異鳥至聽講天人臨甯耽禪悅味當演迦陵音

方上人翹心淨域皎志元棲貽以伽陀旌其妙善
之子法門秀童稚卽多奇語默存真想定慧崇元基青

蓮何馥郁白圭無涅緇淪精水晶域掛魄珊瑚枝玉毫
亮垂彩珍鳥當來儀冷風一冲舉長與五濁辭

二月丙申夕夢與一道士登天台華頂峯聽天風
海濤覺而有作

不信越人語天台去路賒且攜滄海日來看赤城霞暫
挹浮邱袂仍迴長者車覺時明月在失卻碧桃花

夢登岳陽樓觀湖中大雨作

天地忽異色元陰合一湖迅雷翻地軸高浪蹴天衢風
雨作還止魚龍喘未蘇但令膏澤徧何敢怨泥塗

題法闍黎蘭若

古寺隱喬木到來心地清山河當戶牖樓殿出江城石
潤知雲過松疏受月明了然人境外默坐契無生

岐山感舊詩一首

并序

余以同治戊辰成童薙草問道岐山初聞志老
人說法如日照高山大喜溫身不知門外積雪
三尺老松僵折矣乃乞侍巾餅曉夕親炙於灑
掃春爨一身兼任同學數十人皆一時龍象惟
資生艱難四事不具樹皮蓋屋僅避風雨野蔬
充腸微接氣息雖蛇皮橫陳魑魅環露俱能以
道自衛不之懼也余坐五夏頗有省發乃辭去

順流東下放志吳越山水閒觀大潮十甲申秋
捨筏還湘復經六載計別此山草木榮悴凡二
十度志老人示寂十七年於茲矣今春重來訪
舊存者十僅二三衰病又倍其半而余立髮成
素亦將老焉去時於仙人石上所植小松今枝
葉扶疏上蔽雲日撫化沾襟遂成斯詠

弱齡喜聞道遙禮岐山師千里懷耿介中心如渴饑既
入獅子窟始決野狐疑凝神入衆妙飛辯應羣機偶遂
水雲性因與煙巒辭遠犯風濤險周覽海嶽奇游鱗思
舊壑翔羽返故枝靈宇虛宏麗哲人久已萎顧余立鬢

影滅彼青松姿深情抱孤慟幽淚徒空揮夢寐存真契
恍惚昭容儀鈍根諒不棄請以龍華期

岐山禮懶放禪師塔一首

并序

禪師武陵人俗姓毛明末進士與母偕隱開法
於此遺老多依之遇國忌日輒焚香北拜而哭
本傳云爲賈客者乃師託辭其感舊詩有甘爲
浮水萍不作附松蘿天地餘殘梗山河戀夕陽
之句

浮雲一飛散寂寞支公房
峩峩率覩波中有靈骨香崖
花潤新丹空翠朗餘光
孰云神識泯道樹猶芬芳
伊余

入持世言集卷之二
慕高躅隕涕向遙崗孤忠誰爲宣感歎遂成章

三月朔日於岐山與諸苾芻結期坐禪越二七日
時有契悟喜而詠之

季春天氣佳和風送餘清林鳥宣妙語庭樹敷新榮芳
時難屢得高唱發道情誠衆除有漏尅期證無生隙塵
朗清暘松月湛虛明一念成休復六用俱不行圓照泯
能所神解遺身形將循八聖道永與元化冥

五月初九郡守周公偕衡清兩邑侯駕臨大羅漢
寺茶話

閒雲忽驚起太守勸農歸賞我林閒趣來尋竹裏扉池

蓮經雨靜溪鳥掠煙飛坐覺槐陰午蟬聲動翠微

送饒三歸長沙

異鄉一分首日暮碧雲深重憶十年事論交獨此心舊
游餘白社浮世重黃金送子孤舟別蒼波寒我襟

雷池晚眺

層巒忽已暝稚子語煙深欲問入山路惟聞流水音聞
雲不出岫倦鳥自投林萬古雷池月冷然鑒我心

贈漱石和尚

漱公法門舊頭白卧青岑借問看雲意能無出岫心煙
蘿身外滿歲月定中深不動廣長舌松杉演妙音

雨花林興諸道人坐月

幽情俱不淺夜坐話空林獨有青天月能知碧海心
草深寒露滴樹密早涼侵明日一揮手煙霞去路深

宿岫嶠峯感而有作

今夕復何夕草蟲忽已鳴寒鐙照清睡秋月遞微明
未滅青霞想其如白髮生來朝飛錫杖又入桂王城

蔡紹先刺史寄九日登雁峯詩索和因次其韻

策馬天南第一峯知君豪氣逼元龍初聞鸞鶴九霄語
忽訝雲煙萬壑封細雨樓臺生暮靄夕陽城郭度疏鐘
良辰恨未陪吟屐祇隔秋山翠一重

湘陰郭侍郎挽詩

萬里生還入玉門，孤懷寂寞共誰論。
空聞宣室求賢詔，徒使乘槎問水源。
千載豈無公論在，九州猶有謗書存。
安危得失尋常事，好見先皇拭淚痕。

送曹使君之安南

安南南去三千里，匹馬西風怯曉途。
象迹漫山連瘴嶺，龍鱗繞日夢皇都。
珠巖木落猿嘯苦，銅柱秋高海氣孤。
爲道君王輕遠物，不教屬國貢珊瑚。

歲暮書寄楊九峯

山川當歲暮，懷抱若爲寬。
楫楸供朝爨，梅花佐晚餐。
苦

吟孤月冷靜對萬山寒門外長松色期君帶雪看

壬辰正月十二日謁郡守文公語及徐叔鴻侍御
是夜夢徐作此奉寄

洞庭冰折蛟龍宅高閣聯吟坐深夕驄馬遠踏帝京
塵風雪年年憶疇昔衡州太守都中來語及故人心顏
開黃河北望不可渡惟憑清夢繞燕臺繞燕臺天欲雨
夢醒月落烏嘯樹與馬洲前春草生猶記停舟送君處
巾紫峯尋戴山人不遇

巾紫峯前路來尋隱者行林端猶積雪谷口已鳴鶯直
到棲雲處惟聞伐木聲煙霞雖可悅誰與話幽情

二月十日戴雨春見過清涼寺

每對南山雪思爲訪戴行那知成邂逅相與話平生
鳥窺人語寒鐘送客鳴孤吟向明月惆悵綠蘿情

贈鄭衡陽襄三首

爲政風流復幾人山川搖落不言貧
惟憐彭澤江邊柳猶是陶潛醉裏春

落拓江湖四十年祇論詞賦最堪憐
春風細雨衡陽市爭識人間老鄭虔

鄭虔三絕久無倫薄宦生涯亦苦辛
敢謂麒麟終在野莫吟鸚鵡便傷神
清風過樹都成韻秋水爲文自絕塵

他日相期入林麓綠蘿分蔭著書身

李幼蘭明府招住上封寺詩以謝之

名山久寥落而我亦無能況是朱陵勝慚非白足僧幽
棲誠可悅詩債豈宜增願乞青鋒劍爲余斬葛藤

湘鄉過曾文正里居三首

蒼然萬山色爭擁故侯居溪柳風煙裡庭槐雨露餘感
時奮忠義得士在謙虛夜靜松梢月還如照讀書

山館肅遺像須眉凜若生桑麻今蔽野子弟舊談兵芳
草侵階長春池趁雨平後堂局綠野寂寞語流鶯

翊贊中興業勳名第一人恨將三代禮未使四夷賓宵

盱勞 明主艱難念老臣誰能繼雄略殞涕向松筠

訪舜若多曾居士重伯卽以言別

偶攜筇竹杖遠下祝融峰豈憶江南別還從嶽後逢喜
聞談鬼國愁聽打詩鐘明日一揮手春山隔萬重

長沙重晤秦子質侍讀

不謂水雲身逢君亦有因別來如隔世喜極欲沾巾吟
鬢俱生白巖花幾度春無窮滄海事不語亦傷神

秋夜懷設園居士

微霜下庭樹蟋蟀近牀鳴以此虛堂寂因之念友生疎
狂存古道沈醉薄浮名遙想作詩苦吟髭白幾莖

送程校官之瀘溪

瀘溪此去三千里孤棹猿嘯十二時想到蠻荒吟興發
摩挲銅柱自題詩

懷程校官瀘溪道中

瀘水二千里愁君向此行遙憐泊舟處獨聽斷猿聲瘴
氣易成雨蠻花難辨名五溪風月好莫動故園情

南嶽雜感四首

荆榛莽巖谷杖錫欲何之豺虎方爲患存亡未可知但
持心似石不顧命如絲忝入名山住惟將古道期

太息朱陵勝爭將白眼看好雲多出岫幽谷苦求蘭木

落隣山瘦峯高怪日寒
懶殘吾豈敢煨芋問誰餐
層陰合四野萬木已無枝
雪重梅初放風微鶴到遲
神宮羣鼠竄孤嶼亂峯欺
歲暮情無極排愁且賦詩

藤蘿爾何物倚樹敢相纏
只益邪林暗甯妨覺路賢
霜寒松愈翠雲淨月還圓
七十二峯色青青在目前

臘月十五夜與魏公子謙賞雪作

幽人清不寐寒夜興偏長
萬樹梅花色千家明月光
仙風吹鶴語虛室度天香
坐對南山雪思乘白鳳凰

雪霽送魏公子歸第

朱陵洞口夕陽明
青草橋邊草欲生
萬樹梅花四山雪

送君歸騎入春城

昭陵道俗請主獅子峯龍華講席作詩奉辭

壬辰

倦鳥初還惜羽衣白雲心事與時違一枝已足棲余老
懶向獅林深處飛

高山寺僧持啟敦請入院詩以卻之

壬辰

了然塵事不相關萬壑千巖獨往還猶恐世人知佳處
何心更買沃州山

吳中丞登嶽卽贈

癸巳

置身七十二峯巔無復人間未了緣樵客喧傳星使至
山僧猶枕石頭眠留殮聊撥鑪中芋煮茗遙分洞口泉

記取他年爲宰相莫言雲窟有枯禪

贈天上人

吾宗多妙德之子獨殊倫般若心精進禪那味苦辛青蓮方馥郁白業豈緇磷欲證無生忍深悲有漏因遙尋紫葢隱近結碧蘿鄰

紫葢碧蘿俱南嶽峯名

衆鳥窺齋鉢千峯繞

定身浮雲觀世界流水淨根塵莫戀化城住終當轉法輪

七月初三西禪寺聽明果心法師講楞嚴經作此奉讚並呈天首座法林諸道人

澄什此結轍旃檀萃一林浮空無熱翠助梵有幽禽荷

八才五言集卷之二
十
芟消殘暑雲雷送晚陰三乘隆白業半偈賤黃金座上
曇花現空中寶蓋臨羣沾甘露味大轉法輪音妙契車
牛喻澄觀水月心冷然諸籟寂不受一塵侵

乞何詩蓀舍人畫吳越山水歌

何郎書畫天下奇書法乃祖畫法黃大癡求書差比求
畫易求畫往往不與經年時偶逢佳士留真迹陡覺茅
茨石壁生光輝我有久藏越人所貽剡溪藤十幅請君
乘醉染毫時一揮或寫天台石梁雁蕩龍湫之瀑布或
寫太湖洞庭風帆來往沙鳥出沒萬頃之琉璃最好八
月十六錢塘江上千軍萬馬爭擁雪山銀濤排空來猶

愛廬山眞面香鑪五老九疊屏風開儻能爲我一一皆
圖畫吾當燒筍煨芋酌以美酒盈金罍何郎何郎甚勿
十日一山五日一水使我拄杖敲門頻相催

方廣寺

古木寒溪一徑深尋碑蕭寺息松陰朱張祠廟秋雲冷
誰會重巖踏雪心

高臺寺觀念庵松

高臺寒雪曉相過愛看松枝掛碧蘿珍重枯禪勤護惜
念庵手植已無多

嬾殘巖

芋火巖高契嬾殘
捫蘿遠躡碧雲端
一聲長嘯空山月
古柏蒼蒼生夜寒

已公巖

已公茅屋碧苔滋
門外煙蘿絕世姿
山磬一聲松子落
經過誰和杜陵詩

答吳中丞問方廣山水

方廣蓮峯深復深
黑沙潭水清人心
籃輿試打雲邊過
古木蒼藤野寺陰

輓桂陽州陳中丞詩六章

丹陛辭軒冕
滄洲洽隱淪
孤忠惟許

國直道豈妨身臺諫榮遺草封疆惜大臣憂時猶有淚
寂寞灑松筠

西望籌邊日東征拜

命初會趨丞相府請上治安書

文文忠公西事公請專任左恪靖嗣西路統

兵各大臣續報遷調恪靖遂主征討底定回疆魏尙功能就馮唐計豈疎無人
知密畫史論復何如

明珠曾被謗失路阻歸舟戀

關情何極瞻雲意自愁神龍旋赴感綵鷁卽乘流正直

迴天顧還爲閩海游

公東藩被議歸舟至濟甯州屬之十里鋪水涸膠淺禱於河神其夜

水漲三尺遂得暢行未幾卽拜閩臬之命

秉節臨齊魯從公廢寢興金椎隄孔固鐵路議休騰公撫

山東專心治河躬督工役稽核浮昌有議開鐵路者疏請罷之青岱朝敷雨黃河夜渡

冰勤勞爲王事父老至今稱

白首望仍重丹心死未灰似聞宣室詔不棄賈生才一

病嗟難起千秋事可哀神棲復何處應是返蓬萊

雄略無由覩英靈耿未銷曾防廈門寇親射浙江潮公在

閩修沿海激臺備夷及撫浙改造南龍頭海塘重望德星聚其如大樹凋市人

皆雨泣哀吹動雲霄

輓彭剛直詩八首

粵寇方鳴鏑終軍能請纓三湘飛羽檄一鼓下名城公與

塔忠武合軍克湘
潭爲軍興第一功
乍報重湖失
公與楊勇慤攻洞庭
屢因廣將輕敵乃敗旋
聞漢水清
公率諸軍攻武昌躬
冒礮石寇驚大潰
長風吹巨浪併作凱歌聲

岌岌田家鎮堂堂上將臨長江詎爲險鐵鎖至今沉心

與滄洲遠功同赤壁深重巖勒銘處寂寞野猿吟
賊踞田家

鎮以鐵鎖橫江爲扼險計公令孫昌
凱鼓鑪斷鎖鎖進攻大捷泐銘石壁

煙塵犯湖口鼓角莽山隅羣盜餒何熾
戰湖口諸軍疑
畏公獨先進

重圍勢亦孤乘流方苦戰破竹忽歡呼豔絕吳人語彭

郎奪小姑
公克小姑山有百萬軍民齊
奏凱彭郎奪得小姑回語

十年勞汗馬百戰定驚魂始息豺狼鬪長令社稷尊青

山閒欲卧

黃屋屢承

恩萬樹梅花下孤懷誰與論

病骨從顛顚雄心未肯銷江湖淹日月舟楫飽風潮故

壘聲猶肅豪門氣不驕長江間公名字肅然相戒不敢爲大奸宄往來誰復

識踪跡類漁樵公常草笠短褐往來江上人莫之識

碧海乘槎日朱陵攬勝時山僧陪杖履水鳥導旌旗甯

復知官大惟嫌得句遲高風千載上應與鄴侯期

忽下

天門詔秋屯粵海營徒聞馬尾戰敢近虎門行鐵艦隨

風遠金戈耀日明

法人犯閩馬尾失利公時駐兵粵東布置甚密法人終不入虎門實憚公

也

籌邊空畫策恨未斬長鯨

公以和議罷兵爲生平恨事

一代中興將三朝直諫臣
哀時心未已看劒淚沾巾
忍見長城壞難留大樹春
千言遺疏在猶望靖邊塵

與黃芷舫孝廉話舊

一別經三載相逢憶往年
親交倍寥落鬚鬢轉蒼然
孤樹花空發浮雲事屢遷
惟餘碧湖月還似舊時圓

八指頭陀詩集卷之六終

4566

363F